

1<sup>1</sup> محترم تھیافلس صاحب! بہوں سارے لوکاں اُنہاں  
گلاں نے بارے وچ لِخٹے نی کوشش کیتی اے،  
جیہڑیاں ساڑے ہوٹیاں پُوریاں ہویاں۔<sup>2</sup> اے گلاں اُنہاں  
لوکاں اساں تک پہچایاں اُن جیہڑے شروع تُوں اِنہاں گلاں  
نے چشم دید گواہ سُن تے اللہ تعالیٰ نا پیغام سِخاٹے  
آلے بٹی گئے سُن۔<sup>3</sup> میں وی اِنہاں گلاں نے بارے وچ  
بہوں چنگی طرح تحقیق کیتی اے۔ اِس واسطے محترم  
تھیافلس صاحب ہُن میں مُناسب سمجھٹا کہ تُساں  
واسطے اے سارے حالات و واقعات ترتیب وار لِخی  
شوڑاں،<sup>4</sup> تانکہ جیہڑیاں گلاں تُساں کی سِخایاں گئیاں  
اُن اِنہاں وچ تُساں کی کُسے قسم نا شک نا رہے۔

## حضرت یحییٰ نی پیدائش نی پیشگوئی

<sup>5</sup> جیہڑے زمانے وچ یھودیہ مُلخے نا بادشاہ ہیرودیس ہونا  
سی، اُس ویلے حضرت زکریاہ بڑے عبادت خانے نے  
مذہبی پیشوا ہوئے سُن۔ او حضرت موسیٰ نے پہرا حضرت  
ہارون نی نسل وچوں جناب ایباہ نے مذہبی پیشوانواں

نے گروہِ وِچ سُن۔ حضرت زکریاہ نی بیوی نا ناں بی  
 بی اَلِشْبَع سی۔ او وی حضرت ہارون نی نسل وِچوں  
 سی۔<sup>6</sup> حضرت زکریاہ تے اُنہاں نی بیوی دوئے پریزگار  
 سُن، تے او بہوں خلوص نال اللہ تعالیٰ نی شریعت اپر  
 چلنے سُن۔<sup>7</sup> او دوئے بُدھے ہوئی گئے سُن، پر اُنہاں  
 نی اولاد نی سی، کیئانکہ بی بی اَلِشْبَع بانجھ سی۔  
<sup>8</sup> اک واری اِسرح ہویا کہ بڑے عبادت خانے وِچ اللہ  
 تعالیٰ نے حضور خدمت کرنے واسطے حضرت زکریاہ  
 نے خاندان نی واری آئی،<sup>9</sup> تے بڑے عبادت خانے وِچ  
 خوشبودار چیزاں بالٹے نا فریضہ ادا کرنے واسطے حضرت  
 زکریاہ نا ناں قُرعمے نے ذریعے نکلی آیا۔<sup>10</sup> جس ویلے  
 خوشبودار چیزاں بالٹے نا ویلا آیا، تے بہوں سارے لوک  
 بڑے عبادت خانے نے بیہڑے وِچ عبادت کرنے سُن۔  
<sup>11</sup> اُس ویلے خوشبو بالٹے آلی جغہ وِچ سَجھے پاسے  
 حضرت زکریاہ کی اک فرشتہ گھلتے آوا نظر آیا۔<sup>12</sup> اُس  
 کی تکی کے حضرت زکریاہ نا ترآہ نکلی گیا، تے او  
 بہوں ڈرے۔<sup>13</sup> فرشتے اُنہاں کی آخیا، ”زکریاہ، تُوں ڈر

ناں! اللہ تعالیٰ تہاڑی دُعا قبول کری شوڑی آے۔ تہاڑی  
 بیوی کی پُتر ہوسی، تے تُوں اُس نا ناں یحییٰ رَخیاں۔  
 14 تُکی اللہ تعالیٰ بڑی خُوشی دیسی، تے ہور بہوں سارے  
 لوک وی اُس نی پیدائش اپر خُوش ہوسن۔ 15 اللہ تعالیٰ  
 نی نظر وچ او بچہ بہوں عزت آلا ہوسی، تے اُس کی  
 ساری زندگی وچ انگوراں نی شراب یا کوئی ہور شراب،  
 نی پیٹی چاہی نی۔ تے او پیدائش تُوں ہی رُوح پاک نال  
 رنگیا ہوسی۔ 16 اے بڑا ہوئی کے بنی اسرائیل نے بہوں  
 سارے لوکاں کی اللہ تعالیٰ نے رستے اپر موڑسی، جیہڑا  
 اُنہاں نا ربّ آے۔ 17 اے المسیح تُوں پہلے اچھسی۔  
 تے اِس کی حضرت ایاس نی طرح اللہ تعالیٰ نی طرفوں  
 قوت تے صلاحیت لبھسی۔ اے والدین تے اولاد وچ  
 اتفاق پیدا کراسی، غنہگاراں کی پرہیزگاراں نے رستے اپر  
 اُتسی، تے اِسرَح اپٹے ربّ واسطے نیک لوک تیار کرسی۔“  
 18 حضرت زکریاہ فرشتے کی آخیا، ”میں اِس  
 گل اپر کِسرَح یقین کراں؟ کیئانکہ میں تے  
 مہاڑی بیوی اَساں دوئے بڈھے ہوئی گئے آں۔“

19 فرشتے جواب دیتا، ”میں جبرائیل آن، جیہڑا اللہ تعالیٰ نی خدمت وچ حاضر رہٹا آن۔ مکی اللہ تعالیٰ آپوں تہاڑے کول پہیجیا اے، تانکہ تُکی اے خوشخبری دیاں تے اے ساریاں گلاں دسی شوڑاں۔<sup>20</sup> اے ساریاں گلاں تے اپٹے مقرر کردہ وقت اپر ضرور پُوریاں ہوسن۔ پر نشانی نے طور اپر تہاڑی زبان اُس ویلے تک بند رہسی تے تُوں بولی ناں سکسیں، کیئانکہ تُوں مہاڑی گلے اپر یقین نی کیتا۔“

21 اس دوران لوک باہر گھلتے وے زکریاہ نا انتظار کرنے سن، تے بہوں حیران سن کہ انہاں بڑے عبادت خانے نے اندر اتنی دیر کیئاں لائی شوڑی اے۔<sup>22</sup> جیہڑے ویلے زکریاہ اُتھوں باہر نکلے، تے او بلکل بولی نی سکٹے سن۔ انہاں اشارے نال گل سمجھاڑے نی کوشش کیتی سی۔ اس واسطے لوک سمجھی گئے کہ بڑے عبادت خانے وچ زکریاہ کی فرشتے نا دیدار ہویا وے۔<sup>23</sup> حضرت زکریاہ مُقرر کردہ وقت تک بڑے عبادت خانے وچ خدمت کیتی، تے فر او واپس اپٹے کھرے درٹری گئے۔

24 اُنہاں نی بیوی بی بی ایشبع حاملہ ہوئی گئی، فر پنج مہینیاں تک آپے کی چھپائی رہی، تے اپٹے کھرے تون باہر کڈرے وی نی گئی۔ 25 او آخٹی ہوئی سی، ”اللہ تعالیٰ مہاڑے اپر مہربانی کری شوڑی آے، تے مکی لوکاں نے سامٹے رسوا ہوئے تون بچائی کہندا۔“

### حضرت عیسیٰ نی پیدائش نی پیشنگوئی

26 بی بی ایشبع نے حمل نا چھینواں مہینہ سی کہ اللہ تعالیٰ اپٹے فرشتے حضرت جبرائیل کی ریاست گلیل نے شہر ناصرت وچ 27 اک کنواری کڑی کول پہیجیا۔ اُس نی منگٹی حضرت داؤد نی نسل نے اک بندے حضرت یوسف نال ہوئی سی۔ اُس کنواری کڑی نا ناں بی بی مریم سی۔ 28 فرشتے حضرت مریم کول جائی کے آخیا، ”السلامُ علیکم! تہاڑے اپر اللہ تعالیٰ نا فضل ہوئی گیا، تے او ہی تہاڑا مُحافِظِ آے۔“ 29 بی بی مریم فرشتے نیاں گلاں سٹی کے ڈری، تے سوچن لگی، ”اس گل نا مطلب کے اے؟“ 30 فر فرشتے

آخیا، ”مَریم، تُوں ڈر ناں! اللہ تعالیٰ تہاڑے اپر فضل کیتا  
 آے۔<sup>31</sup> تُوں حاملہ ہوسیں، تے تہاڑا پُتر جمسی۔ تُوں  
 اُس نا ناں عیسیٰ رَخیاں۔<sup>32</sup> اُس نا رُتبہ بُلند ہوسی، تے  
 اُس نا لقب ’اللہ تعالیٰ نا پُتر‘ ہوسی۔ اللہ تعالیٰ اُس کی  
 حضرت داؤد نا تخت دیسی، جنہاں نی ہی نسل وچوں  
 اے ہوسی۔<sup>33</sup> تے اِسرح او ہمیشہ واسطے بنی اسرائیلیاں  
 نا بادشاہ ہوسی جس نی بادشاہی ہمیشہ قائم رسی۔“  
<sup>34</sup> بی بی مَریم فرشتے کولوں پُچھیا، ”اے کِسرح  
 ہوئی سکتا؟ میں تے آلیں تک گنّواری آں۔“  
<sup>35</sup> فرشتے جواب دتا، ”رُوح پاک تہاڑے اپر اُترسی، تے اللہ  
 تعالیٰ نی قُدرت تہاڑے اپر ظاہر ہوسی۔ اِس واسطے اُس  
 پاک بچّے کی ’اللہ تعالیٰ نا پُتر‘ آخیا جاسی۔<sup>36</sup> تہاڑی رشتہ  
 دار بی بی اَلِشَبَع وی چھیاں مہینیاں تُوں حاملہ ہوئی وی  
 آے، حالانکہ او بڈھی وی آے، تے لوک اُس کی بانجھ  
 وی آخٹے سٹ۔<sup>37</sup> اللہ تعالیٰ آگرے، گجھ وی ناممکن نی۔“

38 بی بی مَریم آخیا، ”بیشک میں اللہ تعالیٰ نی ہی بندی آن۔ جسرح تُوں دسیا آے، اللہ تعالیٰ اُسرح ہی کرے۔“ فر فرشته اُتھوں تری گیا۔

## بی بی مَریم نا بی بی ایشبَع نے کھار جاٹا

39 فر تھوڑی دیر بعد بی بی مَریم اُتھوں جلدی جلدی ریاست یہودیہ نے پہاڑی علاقے نے اک شہر وچ تری گئی۔ 40 اُتھے جائی کرے او حضرت زکریاہ نے کھار گئی، تے اُنہاں نی بیوی بی بی ایشبَع کی سلام دتا۔ 41 جس ویلے بی بی ایشبَع کی بی بی مَریم سلام کیتا، تے بی بی ایشبَع نے بطن مُبارک وچ بچہ خوشی نال اُچھلیا تے بی بی ایشبَع رُوح پاک نال پھر گئی۔ 42 اُس بی بی مَریم کی اچی آواز وچ آخیا، ”تُوں جناٹیاں وچوں خوش بخت این، تے او بچہ وی خوش بخت اے جیہڑا تہاڑے تُوں پیدا ہوسی۔ 43 مہاڑے اپر کیتنا فضل اے کہ مہاڑے آقا نی والدہ مہاڑے کول آئی اے! 44 کیئانکہ جس ویلے تُوں مکی سلام کیتا، مہاڑے

ٹہڈے وچ مہاڑا بچہ خوشی نال اُچھلیا۔<sup>45</sup> تُوں بہوں  
خوش بخت ایں، کیئانکہ تُوں یقین کیتا کہ او ساریاں  
گلاں پُوریاں ہوسن جیہڑیاں اللہ تعالیٰ تکی دسیاں سٹ۔“

### بی بی مریم نی حمد و ثنا

<sup>46</sup> بی بی مریم آخیا، ”میں سچے دلے  
نال اللہ تعالیٰ نی تعریف کرنی آن۔

<sup>47</sup> اللہ تعالیٰ ہی مکی بچائے آلا اے، میں بہوں ہی  
خوش آن،

<sup>48</sup> کیئانکہ اُس، میں مسکین اپراپٹی مہربانی کیتی اے۔  
ہر زمانے آلے لوک مکی مُبارک آخسن،

<sup>49</sup> کیئانکہ طاقت آلے اللہ مہاڑے واسطے بڑے بڑے کم  
کیتے ان۔

اُس نا ناں پاک اے۔

<sup>50</sup> اے جیہڑے اُس کولوں ڈرنے ان، او ہمیشہ اُنہاں اپر  
اپنا رحم کرنا اے۔

<sup>51</sup> اللہ تعالیٰ اپنی قدرت ظاہر کیتی اے۔



جیہڑے مغرور سن، اُس اُنہاں کی بکھیری شوڑیا آے۔  
 52 اُس بادشاہواں کی فقیر کری شوڑیا آے،  
 تے عاجز لوکاں کی اختیار آلا بٹائی شوڑیا آے۔  
 53 جیہڑے پھکھے ان، اُنہاں کی اللہ رجائی شوڑیا آے۔  
 پَر جیہڑے دولتمند ان، اُنہاں کی خالی ہتھ پہیجی  
 شوڑیا آے۔

54 اُس اپنی خدمت کرنے آلی بنی اسرائیلی قوم نی مدد  
 کیتی آے،  
 کیئانکہ اُسی اپنا او وعدہ یاد آے،  
 55 جیہڑا اُس اسان نے باپ دادیاں نال کیتا،  
 کہ او حضرت ابراہیم تے اُس نی نسل نال ہمیشہ تک  
 رحمت کرسی۔“

56 فر اسرح ہویا کہ بی بی مریم، تے مہیٹے بی بی الیشبع  
 کول رہی۔ اُس توں بعد او واپس اپنے کہار ٹری گئی۔

## حضرت یحییٰ نی پیدائش

57 آخرکار بی بی الیشبع نے بچے نی پیدائش نا ویلا آئی گیا، تے انہاں نا پُتر ہویا۔ 58 جیہڑے ویلے انہاں نے گوانڈیاں تے رشتہ داراں کی پتہ چلیا کہ انہاں اپر اللہ تعالیٰ عنایت کری شوڑی آے، تے او سارے اُس نال خوش ہوئے۔

59 جیہڑے ویلے مُنڈا اٹھاں دیہاڑیاں نا ہویا، تے اُس نیاں سُنتاں ہویاں۔ اُس ویلے لوکاں مُڑے نا ناں اُس نے پیو نے نائیں اپر ’زکریاہ‘ رخٹے نا مشورہ دتا۔ 60 پر اُس نی ماؤ آخیا، ”ناں جی ناں! اِس ناں ’یحییٰ‘ ہونا چاہی نا۔“

61 ساریاں اُس کی آخیا، ”تساں نے خاندان وچ تے اے ناں کسے نا وی نی۔“

62 فر انہاں بچے نے پیو کی اشارہ کری کے پُچھیا، ”اِس بچے نا ناں کے رَخاں؟“ 63 حضرت زکریاہ اِک تختی منگوائی کے اُس اپر لِخیا، ”اِس ناں ’یحییٰ‘ آے۔“ اے گل تکی کے سارے لوک حیران ہوئی گئے۔

64 فر اِسرح ہویا کہ اُسے ویلے اِک دم حضرت زکریاہ نی زبان کھلی گئی، تے او ٹھیک ٹھاک بولن لغی پئے۔

اُنہاں اللہ تعالیٰ نا شکر ادا کیتا، تے اُس نی حمد و ثنا کرن لغی پئے۔<sup>65</sup> اے گل سٹی کے سارے شہر نے لوک حیران ہوئی گئے، تے اے خبر جلدی ہی ریاست یہودیہ نے سارے علاقے وچ پھیلی گئی۔<sup>66</sup> جس وی بندے اے گل سٹی او سوچاں وچ پئی گیا، ”اے بچہ بڑا ہوئی کے، کے بٹسی؟“ کیئانکہ اے گل تے صاف ظاہر سی کہ اللہ تعالیٰ نی قدرت اس بچے نال اے۔

### حضرت زکریاہ نی حمد و ثنا

<sup>67</sup> حضرت یحییٰ نے والد صاحب حضرت زکریاہ رُوح پاک نال رنگی گئے، تے اللہ تعالیٰ نا پیغام لوکاں کی دینا شروع ہوئی گئے۔<sup>68</sup> اُنہاں آخیا،  
 ”سُبْحَانَ اللَّهِ! الْحَمْدُ لِلَّهِ! بَنِي إِسْرَائِيلَ نَعُوذُ بِاللَّهِ  
 شُكْرًا أَعْلَى!

اُس آساں اپر نظرِ کرم کیتی اے تے آساں کی آزادی  
 بخشى اے۔

69 اُس اَساں واسطے اِک طاقتور نجات دیتے آلا پیدا  
کیتا اے،

جیہڑا کہ اپٹے خادم حضرت داؤد نی نسل وچوں اے،  
70 جس نا وعدہ اُس اپٹے پاک نبیاں نے ذریعے بہوں  
پہلے کیتا اے۔

71 او نجات دیتے آلا اَساں کی اپٹے دُشمٹاں کولوں  
تے اُنہاں کولوں جیہڑے اَساں نال نفرت کرنے ان،  
اُنہاں ساریاں کولوں اَساں کی بچاسی۔

72 اِسرح او اَساں نے پیؤ دادے اِپر رحم گرسی،  
تے اپٹے پاک عہد کی ضرور پورا گرسی۔  
73 اللہ تعالیٰ اِس گل نا وعدہ اَساں نے پیؤ دادے حضرت  
اِبراہیم نال کیتا سی

74 کہ او اَساں کی ساریاں دُشمٹاں کولوں

ربائی بخشسی،

تانکہ اَساں بے فکر ہوئی کے اُس نی عبادت گراں،  
75 تے ساری زندگی سچے دلے نال پاک و صاف ہوئی  
کے اُس نی عبادت گراں۔“

## حضرت زکریاہ اپٹے بچّے نال مخاطب ہوئے انٹ

76 ”اے مہاڑے بچّے، تُکی اللہ تعالیٰ نا نبی

آخیا جاسی،

کیئانکہ تُوں ربّ تُوں پہلے تری کرے اُس نا راہ

تیار کرسیں۔

77 تُوں اُس نے لوکاں کی آخسیں کہ او کسرح اپٹے

غناہواں نی مُعافی ہٹی کرے اُنہاں تُوں نجات

حاصل کرن۔

78 اے سارا کجھ اِس واسطے ہوسی کیئانکہ اللہ تعالیٰ

بہوں ہی رحیم و کریم ذات اے،

تے او صُبح نے سُورج نی طرح آسماناں وچوں آساں

کول اچھسی۔

79 اُس نا نُور اُنہاں اپر چمکسی جیہڑے نہیرے وچ،

موت نے مُونہے وچ انٹ،

تے آساں کی امن و سلامتی نی راہ اپر چلاسی۔“

80 او بچّہ یعنی حضرت یحییٰ جوں جوں بڑا ہونٹا گیا، تے

اُس کی قُربتِ الہی حاصل ہوئی رہی۔ اُس دیہاڑے تک

---

او بیاباناں وچ ہی ربیا جدوں تک اُس بنی اسرائیل نے اگے  
دعویٰ نبوت ناں کیتا۔

نور-ے-کشمیر



اللہ تعالیٰ اپنا فضل ترے امن پاک نبیاں نے ذریعے انسانیت پر ظاہر  
کیتا۔ اسان نا دلی مقصد اے کہ اس پیغام کی پھیلا یا جائے۔  
اسان خوشی نال عیسیٰ المسیح نے بارے وچ تسان نال گل  
کرساں، یا تسان نال دُعا کرساں، یا تسان نی مدد کرساں۔



<https://m.me/noor3kashmir> WhatsApp +447726104324 <https://noorekashmir.com>

Copyright © 2020 Noor-e-Kashmir  
Creative Commons Attribution-NonCommercial-NoDerivatives 4.0 International  
(CC BY-NC-ND).